

განმარტავითი ბარათი

საქართველოს კანონის პროექტზე “საქართველოს მთავრობის სტრუქტურის, უფლებამოსილებისა და საქმიანობის წესის შესახებ” საქართველოს კანონში დამატებების შეტანის შესახებ”

ა) ზოგადი ინფორმაცია კანონპროექტის შესახებ:

ა.ა) კანონპროექტის მიღების მიზეზი

კანონის მიღება განპირობებულია ადმინისტრაციულ-ტერიტორიულ ერთეულებში სახელმწიფო რწმუნებულის საქმიანობისათვის საკანონმდებლო საფუძვლების შექმნის აუცილებლობით. ადგილობრივი თვითმმართველობის ორგანოების დელეგირებული კომპეტენციების სფეროში ადმინისტრაციული ხედამხედველობის განსახორციელებლად აუცილებელი გახდება, რომ სახელმწიფო რწმუნებული იყოს არა მხოლოდ პრეზიდენტის, არამედ მთავრობის წარმომადგენელიც ადმინისტრაციულ-ტერიტორიულ ერთეულებში (ვინაიდან ადგილობრივი თვითმმართველობის ორგანოებზე ხდება მთავრობის უფლებამოსილებათა დელეგირება). აღნიშნულიდან გამომდინარე კანონპროექტი ითვალისწინებს სახელმწიფო რწმუნებულის ინსტიტუტის, როგორც ადმინისტრაციულ-ტერიტორიულ ერთეულებში საქართველოს პრეზიდენტისა და მთავრობის წარმომადგენლის დაფუძნებას.

ა.ბ) კანონპროექტის მიზანი

კანონპროექტის მიზანია სახელმწიფო რწმუნებულის ინსტიტუტის სამართლებრივი რეგულირება.

ა.გ) კანონპროექტის ძირითადი არსი

სახელმწიფო რწმუნებულს, კანონპროექტის მიხედვით, გააჩნია შესაბამისი უფლებამოსილებანი, კერძოდ: როგორც პრეზიდენტის წარმომადგენელი იგი უფლებამოსილია საქართველოს კონსტიტუციის 73-ე მუხლის პირველი მუხლის “ი” ქვეპუნქტით გათვალისწინებულ შემთხვევებში საქართველოს პრეზიდენტს წარუდგინოს წინადადებები საკრებულოს საქმიანობის შეჩერებისა ან დათხოვნის თაობაზე, აგრეთვე ადგილობრივი თვითმმართველობის შესახებ ორგანული

კანონის 63-ე მუხლის პირველი პუნქტით გათვალისწინებულ შემთხვევებში საქართველოს პრეზიდენტს წარუდგინოს წინადადებები საკრებულოს უფლებამოსილების ვადამდე შეწყვეტის თაობაზე. როგორც მთავრობის წარმომადგენელი, იგი ახორციელებს ადგილობრივი თვითმმართველობის ორგანოების საქმიანობაზე დელეგირებული კომპეტენციების განხორციელების სფეროში ადმინისტრაციულ ზედამხედველობას, მთავრობის დავალებით ტერიტორიულ ერთეულებში ახორციელებს სოციალურ-ეკონომიკურ განვითარების რეგიონალურ პროგრამებს, მთავრობის დავალებით კოორდინაციას უწევს საქართველოს სამინისტროების ტერიტორიული ორგანოების საქმიანობას.

კანონპროექტის თანახმად სახელმწიფო რწმუნებულს თავისი უფლებამოსილებების განსახორციელებლად გააჩნია ნორმატიული და ინდივიდუალური სამართლებრივი აქტების გამოცემის უფლება. ამასთან, ნორმატიულ აქტებს იგი გამოსცემს მხოლოდ ადმინისტრაციული ზედამხედველობის ფუნქციის განხორციელებისას.

კანონპროექტის თანახმად სახელმწიფო რწმუნებულის სამართლებრივი აქტები შეიძლება გააუქმოს საქართველოს პრეზიდენტმა და საქართველოს მთავრობამ. სახელმწიფო რწმუნებულის სამართლებრივი აქტები შეიძლება გასაჩივრდეს სასამართლოში.

კანონპროექტის თანახმად სახელმწიფო რწმუნებული თავის უფლებამოსილებებს ახორციელებს სახელმწიფო რწმუნებულის ადმინისტრაციის მეშვეობით. ადმინისტრაციის საშტატო განრიგს და მოსამსახურეთა თანამდებობრივი სარგოების განაკვეთებს ამტკიცებს საქართველოს პრეზიდენტი. ადმინისტრაციის საჯარო მოსამსახურეებს "საჯარო სამსახურის შესახებ" საქართველოს კანონის შესაბამისად თანამდებობებზე ნიშნავს და ათავისუფლებს სახელმწიფო რწმუნებული.

სახელმწიფო რწმუნებულის უფლებამოსილებათა ტერიტორიული საზღვრები, სახელმწიფო რწმუნებულის ადმინისტრაციის სტრუქტურა და საქმიანობის წესი განისაზღვრება სახელმწიფო რწმუნებულის დებულებით, რომელსაც ამტკიცებს საქართველოს პრეზიდენტი.

ბ) კანონის პროექტის ფინანსური დასაბუთება

ბ.ა) კანონის პროექტის მიღებასთან დაკავშირებით აუცილებელი ხარჯების დაფინანსების წყარო

სახელმწიფო რწმუნებულისა და მისი ადმინისტრაციის საქმიანობა ფინანსდება საქართველოს სახელმწიფო ბიუჯეტიდან.

ბ.ბ) კანონის პროექტის გავლენა ბიუჯეტის საშემოსავლო ნაწილზე

კანონის პროექტის მიღება გავლენას არ იქონიებს საშემოსავლო ნაწილზე

ბ.გ) კანონის პროექტის გავლენა ბიუჯეტის ხარჯვით ნაწილზე

კანონის პროექტი გავლენას არ იქონიებს ბიუჯეტის ხარჯვით ნაწილზე, რამდენადაც აქ გათვალისწინებული ღონისძიებების დაფინანსება განხორციელდება მიმდინარე წელს ბიუჯეტით დამტკიცებული ასიგნებების ფარგლებში.

ბ.დ) სახელმწიფოს ახალი ფინანსური ვალდებულებები

კანონის პროექტის მიღება არ გამოიწვევს სახელმწიფოსათვის ახალი ფინანსური ვალდებულებების წარმოქმნას.

ბ.ე) კანონის პროექტის მოსალოდნელი ფინანსური შედეგები იმ პირობათვის რომელთა მიმართაც ვრცელდება კანონპროექტის მოქმედება

კანონპროექტი არ გამოიწვევს ფინანსურ შედეგებს იმ პირობისათვის, რომლებზედაც ვრცელდება მისი მოქმედება.

ბ.ვ) კანონის პროექტით დადგენილი გადასახადის, მოსაკრებელი ან სხვა სახის გადასახდელი ოდენობის განსაზღვრის წესი (პრინციპი)

კანონპროექტით არ დგინდება გადასახადის, მოსაკრებელი ან სხვა სახის გადასახდელის ოდენობის განსაზღვრისა და დადგენის წესი.

გ) კანონის პროექტის მიმართება საერთაშორისო სამართლებრივ სტანდარტებთან

გ.ა) კანონის პროექტის მიმართება ევროკავშირის დირექტივებთან

კანონის პროექტი არ ეწინააღმდეგება ევროკავშირის დირექტივებს

გ.ბ) კანონის პროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან

კანონის პროექტის მიღება არ ეწინააღმდეგება საქართველოს მიერ საერთაშორისო ორგანიზაციებში წევრობასთან დაკავშირებით აღებულ ვალდებულებებს.

გ.გ) კანონის პროექტის მიმართება საქართველოს ორმხრივ და მრავალმხრივ ხელშეკრულებებთან

კანონის პროექტის მიღება არ არღვევს და არ ეწინააღმდეგება საქართველოს მიერ დადებულ ორმხრივ და მრავალმხრივი საერთაშორისო ხელშეკრულებებით ნაკისრ ვალდებულებებს.

დ) კანონის პროექტის მომზადების პროცესში მიღებული კონსულტაციები:

და) არასახელმწიფო ან/და საერთაშორისო ორგანიზაცია/ დაწესებულება, ექსპერტები, რომლებმაც მონაწილეობა მიიღეს კანონის პროექტის შემუშავებაში, ასეთის არსებობის შემთხვევაში

კანონის პროექტი არ ყოფილა წარდგენილი ექსპერტებისათვის.

დ.ბ) კანონის პროექტის შემუშავებაში მონაწილე ორგანიზაციის(დაწესებულების) ან/და ექსპერტის შეფასება კანონპროექტის მიმართ

კანონპროექტი შემუშავებაში არ მიუღიათ მონაწილეობა ორგანიზაციებსა და დაწესებულებებს.

დ.გ) კანონის პროექტის ავტორი

კანონპროექტის ავტორია საქართველოს მთავრობის კანცელარია

დ.დ) კანონის პროექტის ინიციატორი

კანონის პროექტის ინიციატორია საქართველოს მთავრობა.